

第一九三册

方輿彙編

山川典

(卷)

蓋竹山部

委羽山部

括蒼山部

三〇

天台山部

三一—三五

桐柏山部

三六

金華山部

三七

仙華山部

三八

爛柯山部

三衢山部

大若巖部

三九

江郎山部

富春山部

小金山部

四〇

華蓋山部

大羅山部

四一

鴈蕩山部

南鴈蕩山部

四二

白石山部

石門山部

四三

古今圖書集成

中華書局影印

第一九三號

中國書局

圖書集成

目錄

卷一

目錄

古今圖書集成

中華書局影印

欽定古今圖書集成方輿彙編山川典

第一百二十卷目錄

蓋竹山部彙考

圖缺

考

蓋竹山部藝文一

詩

蓋竹山

蓋竹歌

蓋竹山部雜錄

蓋竹山部外編

委羽山部彙考

圖缺

考

委羽山部藝文一

委羽山觀記

委羽山部藝文二

詩

題委羽山

委羽山

前題

登委羽山

委羽山

遊委羽山

委羽山部雜錄

括蒼山部彙考

圖缺

考

括蒼山部藝文一

括蒼最高軒記

括蒼山雷雨賦

括蒼山部藝文二

詩

蒼嶺

括蒼洞

過蒼嶺

飲蒼嶺戴明經別墅

括蒼山部紀事

括蒼山部雜錄

括蒼山部外編

宋周莊

鄭懷魁

唐張文伏

元吳淳

明符驗

鄒嘉生

山川典第一百二十卷

蓋竹山部彙考

道書第十九洞天蓋竹山

蓋竹山在今浙江台州府臨海縣南三十里山中有竹如蓋故名一名竹葉山山中有洞即道家所謂長耀寶光之天也又有丹鳳樓飛霞石及香爐石室二峯俱爲遊觀之勝

考

按洞天福地記第十九洞天蓋竹山名長耀寶光之

天週迴八十里在台州黃巖縣葛仙公所居

按方輿勝覽浙江路台州蓋竹山在臨海縣中有洞名長耀寶光之天

按滑確類書區宇部蓋竹山在臨海縣一名竹葉山有石橋龍形龜背架於壑上兩洞合流橋下洩爲瀑布有石室香爐天門三峯有長耀寶光二洞洞淵集以爲第十九洞天有飛霞石舊傳仙人上昇於此石累三層牧孺戲以手搏之不墮

按浙江通志山川攷蓋竹山在台州府臨海縣南三十里

按臨海縣志輿地攷蓋竹山在縣南三十里一名竹葉山中有洞名長耀寶光之天周迴八十里雲笈七籤云仙人商丘子治之道藏洞天記及名山記皆云蓋竹福地觀壇各一所有竹如蓋故名抱朴子云此山可合神丹有仙翁茶園舊傳葛元植苦于此又有禮斗壇石窻石几石牀石硯漢末有陳仲林等四人入此得道又晉許邁嘗居此或云紹興間有二女郎出入洞中疑爲仙女又有丹鳳樓及香爐天門二峯詭異錄特爲遊覽之勝
飛霞石在蓋竹山舊傳仙人上昇于此石累三層牧童戲其上以手搏之不墜

蓋竹山部藝文

蓋竹山

宋唐仲友

籃輿東出雨初收衆山捲霧奔蒼虬麥田幺幺連千疇去年見種今有秋春光欲盡誰挽留千樹巖巖新綠柔桐花遠近淡無思自開自落那關愁洞天與我開晴色使我蠟屐窮冥搜天門發秀萬馬下水口離立羣峯稠瀑泉對面瀉絕壁寶劍却倚丹鳳樓溪聲噴薄雷霆動香爐峰下蛟龍欲中峰特秀小爲貴左右旌節森戈矛幾年秘奧一日覩談笑指示君知不精廬棟宇飛跨水殿堂突兀居上頭軒窗高下有奇致洗滌肺腑明雙眸我將於此棲羽流鳳笙鶴駕應來遊丹成一舉陵九州下視濁世如浮漚晚雲漠漠鳴雨鳩僕僕泥滑聊且休虹橋列炬趣歸騎城鼓已報初更籌追攀別乘聊復爾乘興何如王子猷習池不爲倒載去兒童不用拍手攔街謳

蓋竹歌

明王士性

君不見宇內洞天三十六元都仙伯紛相逐乾坤溟滓初判時巨靈攫取私南服玉笥委羽不足奇亦有蓋竹台南歸香爐峰高元鶴舞天門路狹足風吹洞天日月無終始誰其治之商丘子忽聞大塊飛却灰謫向人間作仙史乞得天孫雲錦章來時挾之下大荒寶光不滅俗緣淺一入長安餐已蒼黃金臺下春風改滄桑幾變仙長在五斗何煩役世塵扁舟却自還東海鄉里小兒誇錦衣誰爲我貴知者稀胡麻可飯水可飲白雲洞裏遲君歸我聞此洞多素書葛洪謂是神仙居他年若返雲中駕七夕相招幸待余

蓋竹山部雜錄

抱朴子內篇古之道士合作神藥者必入名山不止凡山之中可以精思合作藥者惟大小天台華山少室山蓋竹山皆是正神在其山中無山精水魅之擾

蓋竹山部外編

神仙傳介象者字元則會稽人也學道成仙後常住其弟子駱廷雅舍帷下屏牀中有數生論左傳義不平象旁聞之不能忍乃忿然爲決書生知非常人密表薦於吳主象知之欲去曰恐官事拘束我耳廷雅固留吳王徵至武昌甚尊敬之稱爲介君詔令立宅供帳皆是綺繡遺黃金千鎰從象學隱形之術試還後宮出入閨闈莫有見者如此幻法種種變化不可勝數後告言病帝遣左右姬侍以美梨一奩賜象象食之須臾便死帝埋葬之以日中時死哺時已至建業所賜梨付苑吏種之吏後以表聞先主卽發棺視之唯一符耳帝思之興立廟時躬往祭之常有白鶴來集座上遲迴復去後弟子見在蓋竹山中顏色轉少

委羽山部彙考

道書第二洞天之委羽洞

委羽山在今浙江台州府黃巖縣南五里俗名俱依山山東北有洞卽洞天福地記所謂第二洞天也相傳仙人劉奉林駕鶴飛昇之處

考

按太平寰宇記委羽山在黃巖世傳劉奉林於此控鶴輕舉鶴墜羽關故名

按洞天福地記第二洞天委羽洞大有虛明之天周迴萬里司馬季主所理在武州

按方輿勝覽浙東路台州委羽山在黃巖縣南五里世傳仙人劉奉林於此控鶴輕舉嘗墜羽故名真誥云天下第二洞號大有空明之天

按潛確類書區宇部委羽山在台州府黃巖縣昔劉奉林於此控鶴輕舉鶴墜羽關故名宋范宗尹有當年孤鶴知何處遙想天風墜羽翰之句一名俱依山山之東北有洞道書爲大有虛明第二洞天嘗有道士秉燭入洞行兩日不可窮聞櫓聲乃返洞側產方石周正光澤五色錯雜小大百碎亦無不方欲得之者必裹糧撮許撒洞口隨意拾土皆有石在土中不然絕不可得又常有仙女當月夜自洞出逍遙松竹橋之下或扣里人門求水火

按浙江通志山川攷委羽山在台州府黃巖縣城南五里俗號俱依山

按台州府志山水攷委羽山在黃巖縣南五里按登真隱訣真誥皆云委羽山天下第二洞號大有空明之天又十大洞記委羽山大有空明洞在黃巖縣南

數里即大有真人之所治焉一云青童君主之又雲
箕七籤載司馬季主攜其子女隱茲山鮑叔陽段季
正亦於此得解化之道則其爲仙窟舊矣地所產石
無大小百碎皆方正有稜煮之水可瘳疾其前有道
院

委羽山部藝文一

委羽山觀記

宋謝伋

台州黃巖縣南五里有山岡阜連屬草木茂密其洞
曰委羽父老相傳數十年前常有青衣童子戲洞口
居人以滓穢澗之童子忽不見紹興中有石城使君
李端民令茲邑暇日勸課農桑至其處始擇道士董
大方主之稍給香燈瓜華之用大方以符水治疾病
輒卽愈邑人重之以是二十年間堂廟門廡高明觀
淨庫廚漏浴具體而有始變荆榛爲勝地按大洞記
甌粵之間大海之涯地產方石真人劉奉林所居也
奉林嵩高逸士避周季世棲焉控鶴輕舉墜一大翻
人名其山曰委羽伋寓居三童山鐘鼓相聞嘗一再
至及守縉雲大方遣書求文記其事復曰我本山林
人主郡非其好也盍俟歸及使浙右又以書來曰公
又渡浙而西矣歸期寧可以日月計哉且弘農寓公
重道相悅欲成茲事許列銜石上矣敢固以請乃序
之而爲之銘銘曰昔有仙人卯金刀鷄犬同升離阡
陌九臯聲聞至今存上天下會委羽仙人一去幾

千載閱世真同駒過隙長官好事維李侯大洞主人
親推擇穹隆堂廡復一新照應林巒非夙昔寓公者
德上清都豈有他揚畢茲石碧落侍郎寧復來葉令
飛鳧塵幾隔太乙青藜倘可尋去共研硃點周易

委羽山部藝文二

題委羽山

宋謝靈運

委羽山

唐顧况

昔人乘鶴玉京遊翺遺仙洞何幽幽我來尋覓空彝
猶烟霞萬壑明清秋何當騎麟鳳登瀛洲倏忽能
消萬古愁

前題

杜光庭

竇然靈岫五雲深落翺標名震古今芝木迎風香馥
馥松檉蔽日影森森從師只擬尋司馬訪道終期謁
奉林欲問空明奇勝處地藏方石恰如金

登委羽山

宋王十朋

龜峰軟翠日開屏羽客逍遙此閉局早起留雲閒放
鶴夜來伴月靜看經巖前方石自多好竈裏丹砂且
是靈應有赤城鸞鳳過一聲長嘯入青冥

委羽山

明鄭善夫

東海龜茲仙聖居琅玕芝艸洞天虛函關已斷青牛
駕委羽欣逢白鹿車

遊委羽山 王叔英
仙子何年昇碧落至今洞口擁晴雲東嶺煮石無爲
侶獨倚空山到夕曛

委羽山部雜錄

輟耕錄吾鄉台之黃巖諸山脈絡相連屬大江越州
治北自州出南門陸行四五里許有委羽山特立不
倚形如落舞鳳故得名然州人與之朝夕者俱弗自
知其爲勝山旁廣而中深青樹翠蔓蔭翳鬱幽泉
琮琤若鳴珮環於修竹間千變萬態不可狀其略中
藏洞穴仙家所謂空明洞天者是也好道之士嘗持
炬入行兩日不可窮聞櫓聲乃出洞之側產方石周
正光澤五色錯雜雖加琢磨殆不是過大者三四分
小者比米粒而小以斧粉碎之亦無不端方見長老
言嘗有素服靚妝飄飄然若仙女者當風清月白時
則逍遙乎松杉竹柏之下或時變服叩里人門求水
火里人所居去洞所不能百步異其狀密覘之迺選
從洞中去里人以爲怪糞其地越數日里人家夜失
火勢張甚不可滅室宇一空妻子僅以身免遂流離
他處識者以爲厭穢仙境故致此奇禍自是仙女不
復出矣余幼時尚及見里人故址至今有欲得方石
者裹糧撮許往洞口撒之隨意拾地上土則有石在

土中不爾絕無有也

括蒼山部彙考

道書第十大洞天之括蒼洞

括蒼山在今浙江台州府臨海縣之西南仙居縣之東南處州府麗水縣之西縉雲縣之東一名真隱山又名蒼山又名蒼嶺山下有洞即十大洞天之成德隱真天也

考

按五嶽圖序括蒼山東嶽之佐

按洞天福地記第十大洞天括蒼洞成德隱真之天廣三百里平仲節所理在台州樂安縣

按方輿勝覽浙東路台州括蒼洞在天台縣東南三十里披塵外記括蒼成德隱元之天蓋十洞天也

蒼嶺在仙居西北五十里高五十丈

處州括蒼山福地爲七十二福地之一

小括蒼山高三十五丈周圍三里州治在其上其路屈曲爲九盤以入醺門寰宇記云括蒼山在台州今

之蒼嶺是也隋志云處州有括蒼山

按地理通釋十道山川攷江南括蒼山在處州麗水

縣本括州隋置括蒼縣唐改註輿地廣記台州臨海縣有括蒼山寰宇記今蒼嶺

按廣輿記台州府括蒼山在府城西南唐天寶中改曰真隱與仙居韋光山接舊經云王方平往來羅浮括蒼即此

處州府括蒼山在縉雲一名蒼嶺道書十大洞天之一周三百里東跨仙居南控臨海吳錄云登其山俯觀雷雨高一萬六千丈棠溪赤溪管溪三水環遶其下

按潛確類書區宇部括蒼山在台州府西南唐天寶中改曰真隱高一萬六千丈周三百里與仙居草羌山接

括蒼山又在縉雲四面石壁可容數千人

按浙江通志山川攷真隱山在台州府臨海縣西南四十里本名括蒼又名天鼻唐天寶中改今名

括蒼山在台州府仙居縣城東南四十里高一萬六千丈登之見東海又名天鼻巉巖四絕俯瞰諸山綿亘三百餘里殆台金溫處四郡之嶽云

蒼嶺在仙居縣西一百里與括蒼山通故名一名風門

括蒼洞在仙居縣城東南五十里塵外記稱爲第十洞天與處州之玉虛洞通

小括蒼山在處州府麗水縣衆山環簇狀如蓮花又名蓮城山徑路盤紆亦名九盤嶺唐宋州治皆在焉

蒼嶺又在縉雲縣與仙居縣連界

按臨海縣志輿地攷真隱山在縣西南四十里本名括蒼山唐天寶中改今名按道書云括蒼山在會稽

山東南五嶽圖序云括蒼山東嶽之佐今石壁上有蝌蚪字高不可識宋元嘉中遣名畫圖于團扇焉

按仙居縣志山川攷蒼山在縣東南四十里以其色蒼蒼然接海故名舊稱括蒼又名天鼻巉巖四絕俯瞰諸山當日落雨餘則青紫列眉不可名狀在縣之

四十五都山有八面一面仙居之凝仙宮其七則天台臨海黃巖樂清永嘉縉雲東陽七縣界綿亘三百餘里殆吾台與金溫處四郡之嶽云

括蒼洞在縣東南五十里塵外記稱爲第十洞天與處之玉虛洞通唐天寶七年慶雲覆洞太史奏真氣見台宿詔建宮榜曰成德隱元寶曆中道人葉藏質重修之宋天禧元年賜額疑真宮崇寧二年邑令蘇

教奏封靈應真人光宗在儲官書瓊章寶藏四字鎮之理宗賜金星官像蓋仙境也慶雲道士王崇祐撰十天志十卷今無考明張鍾參詩云星翻百葉朝凝月霞掩巖扉午亦燈可以識其概矣

紫雲洞即括蒼洞口之小洞上有石色若紫云濕雨燥晴占者不爽後漢葛孝先葛元俱煉丹其上并猶存晉羊愔罷峽江尉隱此食青靈芝仙去

蒼嶺在縣西一百里與括蒼山通故名一名風門陡崖複徑險峻爲浙東最上爲南田村水田漠漠每當秋深碧雲紅葉宛若圖畫行者應接忘疲焉其下通永康爲婺括甌閩孔道

括蒼山部藝文一

括蒼最高軒記

宋周莊

治平初南昌范純孝爲劍州令策杖得九姑山作亭遂爲括蒼遊絕冠絕聖間衡人袁希仲暨崇寧間邑人皆繼作厥後絃歌弗嗣亭廢不修垂三十年齊州姚公爲縣又新之亭負鶴嶺陰崖薄雲青壁斗絕下控石馬重複百里勢決奔浪橫倚縣治西北隅張首寥廓間若擎紫霧欲騰去而亭峙其上昔青囊氏欲售其術輒附會而言曰頭角奮異人出矣宣和六年公治多暇坐日照堂隱几頽望蒼翠森如遂拉僚友却盡檣願臨絕頂四顧而興嘆命誅藤蔓徘徊舊址曰憑虛高舉冷然御風蓬壺遊也乃飭能吏董其役未幾告成欄跳白日頂摩蒼穹皎皎飛出空際巖壁溢秀煙霞漲彩不動容色燦金碧丹雘于頽垣茨棘之間雲山千里松竹萬家景與目共豈能賦者足以詒美哉爲是遊者將抗懷遠覽飄飄交雲必有搏扶搖九萬踵前人遐轍隨公絕塵以遂最高之名因酌酒爲公壽且祝曰潭潭紫府槐陰清晝他日尚能眷懷于茲以慰吾人之思否靖康改元四月十五日記

括蒼山雷雨賦

鄭懷魁

靈越括蒼之洞天喬嶽岱宗之佐命成德則賢哲攸鍾隱真則神異斯應北連華蓋南跨鼎湖作邦名鎮爲仙居都方平通其元化仲節受其靈符儀天成文察地方紀顯少微之處士孕縉雲之才子其隆崇也萬六千丈其盤紆也三百餘里七界同原八向異象狀峯岑以岵嶇氣蔚蔚而決滂不電乃迅雷發聲無

雲忽霖雨成響信茲山之奇變美難得而髣髴時則有越國大夫三駕至其陽九折臨其巔濯纓于西溪秣馴乎南縣進伯雅釋孟勞薦雕枕舒文憐心不寐而耿耿耳諦聽以嘈嘈軒轟訇鉤滂淅蕭駭始殷地以底空既傾山而激石枕幹枯柏之林潐蒼陵麓之邑有似豐隆之所震動屏翳之所蕩滌觸之者霍靡當之者辟易硤礪焉礪礪焉淅淅焉淅淅焉于斯時也獸駭不眠伏鳥翼不展棲文雉鼓翼而朝雉元雌昂鼻以夜啼匪還物其無懼熱納釐而不迷原夫陰陽載交震坎互列惟也也動而滿盈惟解也作而甲拆至乃非虺非虺若冥若填迴薄不已轉轆無垠詎意大塊之氣自叩虛化之神爰答霽響用矢浩歌擬捷琴引之霹靂喻雅詩之滂沱

括蒼山部藝文二

詩

蒼嶺

唐張文伏

絕壁不可攀懸崖不可下路險心自平由來無取舍穩穩須教著步行前途荆棘胡從生

括蒼洞

元吳淳

五雲深處即蓬萊岩谷哈呀十洞開瑤草丹霞連委羽桃花流水接天台斗壇月落鸞笙遠珠館風清鶴駕回洞裏仙人如有待春明朝罷早歸來

過蒼嶺

明符驗

曉發括蒼嶺穿雲上紫霄披茅妨曲徑歷險度敝橋仙子悲塵台征夫怯路遙投間還復出山鳥亦相嘲

飲蒼嶺戴明經別墅

鄭嘉生

九仙西望月嵯峨樓托山家似繭巢雲陟壑陰排日起樹圍山髻簇樓多村莊極目分青黛谷酒催涼剪碧荷何日胡麻似車騎恰來劉阮欲悲歌

括蒼山部紀事

居易錄處州劉一介少年棄家入括蒼山中緣竹徑而入一百二十里綠陰無間遂隱于此榜所居曰綠天深處五里一亭十里一室不入城市者六十年太守任宗華往造之三日始得見

括蒼山部雜錄

吳錄括蒼山登之俯視若雷雨也
宋喻良能括蒼舊州治記浙東山水甲天下括蒼復甲浙東州宅奇秀又括蒼之傑特偉觀

括蒼山部外編

神仙傳王遠字方平東海人也嘗欲東入括蒼山過吳住胥門蔡經家蔡經者小民耳而骨相當仙遠知之故住其家遂語經曰汝生命應得度世欲取汝以補官僚耳然少不知道今氣少肉多不得上去當爲屍解如從狗竇中過耳于是告以要言乃委經而去經後忽身體發熱如火欲得冷水灌之舉家汲水灌之三日乃入室以被自覆忽然失之視其被內惟有皮頭足具如蟬蛻也去十餘年忽還家容色少壯鬢髮鬢黑語家人曰七月七日王君當來其日可多作飲食以供從官至其日經家乃借瓮器作飲食百餘斛羅列布置庭下是日王君果來未至先聞金鼓蕭管人馬之聲比近皆驚莫知所在及至經舍舉家皆見遠冠遠遊冠朱衣虎頭盤囊五色綬帶劍黃色少髯長短中形人也乘羽車駕五龍龍各異色前後麾節幡旗導從威儀奕奕如大將軍也有十二伍伯皆以蠟封其口鼓吹皆乘龍從天而下懸集于庭從官皆長丈餘不從道衢既至從官皆隱不知所在唯見遠獨坐耳須臾引見經父母兄弟因遣人召麻姑亦莫知麻姑爲何人也言曰王方平敬報久不到民間今來在此想姑能暫來語否須臾信還不見其使但聞信語曰麻姑載拜不相見忽已五百餘年尊卑有序拜敬無階煩信承來在彼食頃即到先受命當按行蓬萊今便暫往如是當還還便親觀願未即去如此兩時間麻姑來來時亦先聞人馬聲既至從官半于遠也麻姑至蔡經亦舉家見之是好女子年可十八九許于頂上作髻餘髮散垂至腰衣有文采又非

錦綺光彩耀日不可名狀皆世之所無也入拜遠還爲之起立坐定各進行廚皆金盤玉杯無限也餽饌多是諸花而香氣達于內外擘脯而食之云麟脯麻姑自說云接待以來已見東海三爲桑田向到蓬萊又水淺于往日會時略半耳豈將復爲陵陸乎遠嘆曰聖人皆言海中行復揚塵也麻姑欲見蔡經母及婦等時經弟婦新產數日姑見知之曰噫且立勿前即求少許米來得米擲之墮地謂以米祛其穢也視其米皆成丹沙遠笑曰姑故年少也吾老矣不喜復作如此狡猾變化也遠謂經家人曰吾欲賜汝輩美酒此酒方出天廚其味醇醲非俗人所宜飲飲之或能爛腸今當以水和之汝輩勿怪也乃以斗水合升酒攪之以賜經家人人人飲一升許皆醉良久酒盡遠遣左右曰不足復還取也以千錢與餘杭姥乞醯酒須臾信還得一油囊酒五斗許使傳餘杭姥答言忒地上酒不中尊飲耳麻姑手爪似鳥經見之心中心念曰背大癢時得此爪以爬背當佳也遠已知經心中所言即使引經鞭之謂曰麻姑神人也汝何忽謂此爪可爬背耶但見鞭者經背亦莫見有人持鞭者遠告經曰吾鞭不可妄得也經此舍有姓陳者失其名嘗罷縣尉聞經家有神人乃詣門叩頭求乞拜見于是遠使引前與語此人便從驅使比于蔡經遠曰君且向日而立遠從後觀之曰君心邪不正終未可教以仙道當授君地上主者之職司臨去以一符并一傳著小箱中與陳尉告言此不能令君度世止能存君本壽自出百歲向上可以禳災治病者命未終及無罪者君以符到其家便愈矣若邪鬼血食作祟禍

者便帶此符以傳救吏遣其鬼君心中亦當知其輕重臨時以意治之陳以此符治病有效事之者數百家壽一百一十歲而死後子弟行其符不復驗矣遠去後經家所作飲食數百斛皆盡亦不見有人飲食也經父母私問經曰王君是何神人復居何處經曰常在崑崙山往來羅浮括蒼等山上皆有宮室主天曹事一日之中與天上相反覆者十數過地上五嶽生死之事皆先來告王君王君出城盡將百官從行唯乘一黃麟將十數侍人每行常見山林在下去地常數百丈所到則山海之神皆來奉迎拜謁其後數十年經復暫歸家遠有書與陳尉其書廓落大而不工先是人無知方平名遠者因此乃知之陳尉家于今世世存錄王君手書并符傳于小箱中集異記唐葉法善字道元常遊括蒼山白馬山石室內遇三神人皆錦衣寶冠謂法善曰我奉太上命以密旨告于子本太極紫微左仙卿以校錄不勤謫于人世速宜立功濟人佐國功滿當復舊任以正三五之法今授于子又勤行助化宜勉之焉言訖而去自是誅蕩精怪掃滅凶祇後至景龍四年辛亥二月九日括蒼山三神人又降傳太上之命曰汝當輔我睿宗及開元聖帝未可隱跡山巖以曠委任言訖而去時二帝未立而廟號年號皆已知其年八月果有詔徵入京迨後平韋后立相王睿宗歷元宗朝授銀青光祿大夫鴻臚卿越國公景龍觀主

欽定古今圖書集成方輿彙編山川典

第一百二十一卷目錄

天台山部彙考一

圖考



山川典第一百二十一卷

天台山部彙考一

漢劉晨阮肇遇仙之天台山

天台山在今浙江台州府天台縣城北三里高一萬八千丈周迴八百里山有八重四面如一其峯巒延亙支麓所分隨地異名而要皆謂之天台山即道書第六大洞天赤城洞也相傳漢劉晨阮肇遇仙於此

天台山圖



考

按會稽記赤城山內則有天台靈嶽玉室瑤臺天台山舊居五縣之餘地五縣餘姚鄞句章剡始寧也

赤城山土色皆赤巖岫連沓狀似雲霞懸溜千仞謂之瀑布飛流灑散冬夏不竭山谷絕澗崢嶸無底長松蔓蘿幽藹其上

按真誥天台山高一萬八千丈周迴八百里山有八重四面如一當牛斗之分上應台星故曰天台

按臨海記天台山上應台星超然秀出山有八重視之如一帆船高一萬八千丈周迴八百里又有飛泉懸流千丈如布

按啓蒙記天台山去天不遠路經檣溪溪水清冷前有石橋闊不盈尺長數十丈下臨絕冥之澗惟忘其身然後能濟濟者梯巖壁捫蘿葛之莖度得平路見天台山蔚然綺秀列雙嶺于青霄上有瓊樓玉闕天堂碧林醴泉仙物無不畢具晉隱士白道猷得過之獲醴泉紫芝靈藥

按唐書地理志江南道台州臨海郡唐興有土牆山鼻山天台山

按洞天福地記第六大洞天赤城洞上清玉平之天廣八百里王君所理在台州唐興縣

第十二福地靈墟在台州天台山司馬天師居之按地理通釋十道山川攷天台山在江南台州天台縣北十里一曰桐柏山高一萬八千丈周迴八百里

赤城山在縣北六里天台之南門也名山略記曰葛仙公山也孫綽有賦唐司馬子微廬天台隋徐則入天台山

按方輿勝覽浙東路台州天台山在天台縣西一百一十里洞天福地記天台山名上清玉平之天即桐柏真人所理亦名桐柏山晉孫綽字興公爲永嘉太守意將解印以向幽寂聞天台山神秀可以長往因使圖其狀遙爲之賦賦成示友人范榮期榮期曰此賦擲地必作金聲

按廣輿記天台山在台州府天台縣道書謂上應台星高一萬八千丈周迴八百里從臺華亭右麓視石

梁若在天半廣不盈尺長數十丈下臨絕澗惟攀蘿梯巖乃可登上有瓊樓玉閣碧林醴泉瑤草神奇莫可名狀舊稱金庭洞天

按三才圖會天台山圖考天台山在天台縣西一百一十里臨海記天台山有八重視之如一帆高一萬八千丈周圍八百里又云以高大之故上應天之三台星故稱台嶽遊天台必自赤城始此山之南門也自是而北則循佛壘傍石橋由石橋東行則爲天封華頂西行則爲萬年桃源兩巖則爲洞天桐柏于是遂結束自赤城始赤城山純石霞色望之壁立如城具雉堞絕頂有浮屠七級西北有玉京洞金錢池寺廢無僧由九里松北行踰金地嶺與紫雲嶺相連其下爲漢隱士高察讀書堂又五里踰銀地嶺至大慈寺前觀佛隴二大字寺僧曰此知顓師之初修地也又北行抵石橋先上曇華亭倚檻觀之見兩岸門立而石橋橫互其上山北左右肩有雙泉飛出合流而來至橋乃伏出其下瀉爲瀑可百餘丈掛巖石間復由亭石麓下至新亭接其端而坐則見石橋已在半天而隕雪之流自空中下擊潭水作疾雷聲震動林谷從山西行尋萬年寺由鐵船峽度羅漢嶺山嶠水迴每數里輒一曲及至上方地則砥平如仰盂登妙蓮閣四眺則八峰迴抱而直南諸阜崇嶺如列戟徘徊兩澗水西寺門乃合流潏潏南出前林松杉成列東澗古松數株皆大十圍鶴鶴多巢其上每休坐樹陰則聞鶴鼓牙及鶴唳之音與風泉相雜儼然非復人世由此東北行至劉阮洞洞去東澗二里而遠洞口如門有古木神祠沿澗而上兩山繡壁參差夾水立

水隨山曲時漱石有聲曰鳴澗水端草樹芊綿東嶠特葱蒨可喜曰桃花塢又折而北上路漸艱澀及水窮而路盡有巨潭渟渟如鏡中有洞門潛通山底其深莫測此所謂金橋潭也即劉晨阮肇遇仙處潭之南有盤石可坐仰望三峰倚天而東峰特秀上有石如綰髻鬟曰雙女峰昔人見雙鬟戲水或曰乃其精靈所爲即寺觀巖石亦奇怪又循董家廟小田鋪涉三四溪至廣嚴寺貧婆鐘寺有榮師肉身像師宋人習禪定多異跡時呼爲榮羅漢死而不腐過寧國寺有寒明兩巖巖最大略如雁蕩寒巖但差小爾巖西面有唐帽乘馬痕相傳爲閭丘太守像旁有大石筍如天柱峰正北洞寬平可列席旅會南有小塘外有八寸關寒巖後洞比明巖尤達且廣可容百駟而梵宇亦宏敞正寒山子所居由顧儒嶺涉歡溪訪齊處士顧歡讀書堂於普慶寺舊號靈墟實智大師註解涅槃經處佛殿極壯麗有桀石智者嶺卓錫泉北望一峰摩雲即華頂也中峰孤峭如華蓋諸嶼拱羅寺毀僅餘數廊衆木扶疎多檜杉檉櫚其旁近地有王羲之墨池李太白讀書堂又逕從北上可三四里有望海尖登其絕頂則錢塘煙樹括蒼峯巒皆隱約可見焉自此南行至文殊寺再上山山脊行則凡邑內諸山皆若翔舞奔躍在輿馬左右直南曰桐柏岡其地有臥龍玉女紫霄玉笥翠微蓮華玉泉華琳香琳凡九峯而桐柏宮當其心平原曠衍有村落溪流橋梁水確道書稱爲金庭洞天唐司馬承禎奉敕建爲桐柏觀未改爲崇道觀今復爲桐柏宮云西北宮有瓊臺雙闕去宮可六七里瓊臺三面皆翠壁萬仞聳

峭相向如城郭周圍而臺則南向懸居其中折而東南可二里許爲雙闕翠壁山至此忽中斷對峙如闕門路出其下而澗水從之然巖石皆陡絕不可下觀而四壁之華葉曜日含風綺繡紛錯祕香芬鬱俯瞰百丈潭在台麓紆繞雙闕流入雲溪屏息無譁其聽益遠真天台山之一奇觀也出洞門盤折而行數里至福聖莊觀瀑布又逕遷而北至翠屏山觀三井皆奇自文殊寺來謂桐柏已在平地及觀瀑布三井始覺其地又在衆山之上乃復驚詫以爲大奇按天台縣志與地篇天台山在縣北三里是神跡石延袤國清赤城桐柏至于華頂皆名天台實一邑諸山之總號舊志載陶隱居真誥云高一萬八千丈周圍八百里山有八重四面如一當牛斗之分上應台星故曰天台一曰大小台與地志云天台山一名桐柏衆嶽之最秀者也徐靈府記云天台山與桐柏相接而少異或又號靈越晉孫綽嘗作天台山賦台山之名天下自此始一統志云山去人不遠路由福溪水險而清前有石橋廣不盈尺長數十丈下臨絕澗惟忘其身然後能濟濟者梯巖壁援藤葛始得平路見天台山巖然奇秀雙列于青霄上有瓊臺玉闕天堂碧林醴泉仙物畢具也赤城山在縣北六里一名燒山曰消山石皆霞色望之如雉堞因以爲各山之麓有巖極深廣晉義熙初僧曇猷造寺號中巖齊僧慧明復就塑一佛名臥佛又有巖二曰結集曰釋籤蓋灌頂湛然遺跡也西有玉京洞北有金錢池相傳雲蘭憩此誦經有神獻金錢僧棄池中故名絕頂有浮屠七級下有臺猷洗腸

井今井邊猶生青韭即其驗也大抵皆峭壁不可登上有人井飛流噴沫冬夏不竭或曰釋籤當作釋箋以湛然居巖中解釋天台教而各結集以灌頂哀集天台山教未詳孰是

桐柏山在縣西北二十里十二都七十二福地之一由清溪迤北而入嶺路九折至洞門一望佳景豁然道觀屹處其中唐司馬承禎隱此舊圖經周靈王太子晉主金庭治桐柏山即此也

瓊臺雙闕兩山自桐柏山西北行二里至元應真人祠取道仙人蹟經龍潭側凡五里至瓊臺轉南三里至雙闕皆翠壁萬仞森倚相向宋祥符中山人張無夢結菴于此徐大受山行摘句云大壑之心瓊臺突起嵐光破綠狀如削瓜下俯百丈龍湫心悸骨驚不可近視沿流五里至雙闕幽花凝岸苔茵布石仙家之奇觀也

瀑布山一名紫凝在縣西四十里三十二都山有瀑布垂流千丈遙望如布陸羽記云天下第十七水蓋與國清福聖二瀑為三其山產大葉茶志要云福聖之瀑布源出桐柏山金澗二井之泉懸流數百尺落于萬仞之崖冬夏不竭遠而望之瑩白如練懸掛隱映于蒼崖翠壁間卒然一視恍若天河之傾瀉也石橋山在縣北五十里十五都兩山相並連互一百里舊傳五百應真之境有石梁架兩崖間龍形龜背廣不盈尺其上雙澗合流洩為瀑布西流出刻中下臨萬仞飛泉回射危滑欹側狀如橫虹且多莓苔甚滑過者目眩心悸按赤城舊志云凡往來人供茗必有乳花顯應或寶炬金雀靈跡梵響接于見聞云

東橫山在縣東十里八都九都界以其橫據縣東故名狀如覆舟舊名覆舟山四面迴絕無所連接神邑山圖謂為台山之脚其上坦夷可三十頃中有三泉冬溫夏冽側有古淨池今蕪沒山南盡處有石如婦人舊稱為新婦巖山足相傳下有石鴨識云水打石鴨頭此地出公侯又云水打鴨頭穿天台出狀元每溪流逼向此山下則有顯宦其山頂方闊明萬曆九年知縣毛鶴騰建丹丘臺

九峯山在縣西北十五里十三都其峰有九徐靈府小錄云瀑布寺前有九峯蓋台山之枝幹舊名九隴王羲之與支遁常遊焉唐天寶六年改九峯神邑山圖云此嘗創建桐溪寺

鳳凰山在縣東十里六都志要云山形似鳳者三故其地亦名鳳林崖上有仙人掌跡甚鉅南有釣魚臺及呂洞賓所遊之地名為呂道岸其地夏日蚊蠅不入所產艾草入藥最佳

蒼山在縣東四十里五都神邑山圖云其山凌映桐柏絕頂踰滄海以其蒼蒼接漢故名古經云其山鳴吼必有大風雨神邑以桐柏接軍海界在縣東極處非今置觀之桐柏也

寒巖山在縣西南七十里三十六都因寒山子得名前有磐石曰晏坐峯上有石室舊名指石洞後米公芾題曰潛真四山環峙如郭郭上矗雲漢其下嵌空置佛屋不用瓦覆由宴坐西有石梁可數尺架兩崖間險峻不可陟南有泉如屋雷寺僧懸竹鞭引之前距山腹一里有道人洞轉西二里亂石灑流巖竇間散若虬髯因號龍鬚洞台山絕勝處也臨海記云石

室前有立石參差五色遠望如綬帶舊傳為綬帶山產石髓石脂絕妙有仙石棺

明巖山在縣西七十里三十三都舊名暗巖巖之前峭壁屹立勢摩霄蒼蒼亦號幽石其下竅穴透達日光穿漏中有僧舍宰樓真洞轉北數步怪石森然上有兩峰倒側號合掌巖西有泉蔽巖而下渙若垂箔寺僧亦用竹鞭引之從高下墜號曰水索由寺北捫蘿而下至重巖磐石品列即三隱味嘆之地常有光如月號石月寺東有響巖擊之聲鏗然寒山子詩所謂重巖我卜居鳥道絕人迹是也

大盆山在縣西一百八十里三十七都西接東陽南界仙居遙望山形如覆盆故名

大柱山在縣西九十里三十六都南有黃水峯方瀛山在縣西北二十八里十二都由桐柏北上一峯可五里許上有平田十餘畝間以陂池前眺蒼峯後即雲蓋峰唐長慶中徐靈府居此因賜今名

繫船山在縣東四十里一都南陽舊傳古煎鹽處有石盤柱尚存有巨石橫互海波沃日舟人常繫纜于此邑志一名髻山赤城舊志又有髻山在縣東四十里以其形如髻然故名之

司馬梅山在縣北一十三里十一都道書此為第十六福地舊傳司馬承禎應召至此而悔因為名又雲笈七籤載司馬梅山在台州府天台山北李明仙人所治之處

始豐山在縣西南十五里十九都舊以狀類盤龍名龍山唐天寶中更今名

折山在縣西十六里十六都神邑山圖云其山峭埒

險折而中峯拔立孤秀舊傳王喬控鶴于此又名鶴峰

鼻山在縣西南一十五里二十三都以形名載唐書地理志下有龍湫旱禱常應

土牆山在縣西五十里二十七都屹若牆立故名見唐書地理志

峇山在縣西五十里二十九都舊志云在西南一十五里蓋誤

甌山在縣西三十五里一十五都下有釣磯石松山在縣東南四十里二都

擔山在縣西南三十五里二十四都招賢山在縣東四十五里一都又名雙峰山

焦山在縣西南六十里三十四都靈墟山舊志在縣北三十里一都白雲先生隱處

圖經云在縣北六十里蓋七十二福地之一八峰山在縣西北六十里十五都中有萬年寺所謂

八峰明月婆羅香爐大舍銅魚藏象烟霞應澤是也牛遊山在縣東五十里四都東巖有片石似牛遊形

成窩舊傳神牛浴此蹄跡陰痕尚在俗呼爲石牛遊覆盆山在縣東四十里一都頂平東西二隅有二井

地里家以爲台郡臨海山川之美皆是此胚胎運衍發秀其說所謂覆盆孕秀是也

亭山在縣東三十里二都接石山在縣東四十里一都

寶華山在縣東三十里四都產花乳石色如瑤瑁堂潤堅潔可愛李德裕謝寄石詩聞君采奇石剪斷赤

城霞宋林逋謝天台僧寄石枕詩斷石自何許枕之

懷赤城皆謂此也稍西有雲頂菴距山足一二里有巒岫如帶與溪流俱西向環拱縣境因名帶橫相傳其地唐時有王尚書居于此

銀山在縣南十里二十都宋元祐間因鑛發故名後因鑿山壓死人衆燒煉無銀遂廢萬曆二十六年凡

舊鑛處朝廷悉令開採四月初四日太監曹安官來鑿此山無銀堪與家先言此山居午動必致火五月

間縣東南果被火災本年八月復委官開採仍無銀二十七年閏四月太監劉同本府黃二守督工深入

取砂面烹亦無銀而止菑山在縣西六十里三十五都

大淡小淡二山在縣南二十里七都峯勢連接周圍三里

龜山在縣南五里山形類龜下有潭極深大旱不竭有魚蝦之利

鯉山與龜山相近澹山在縣西七十里三十五都

雷馬山在縣西九十里三十五都方山在縣西六十里三十五都其山高峻千餘丈山

麓周圍十五里自足至頂皆方故名山之右有陰溪苗左有甌山苗此居其中山巔有廟鎮之

白衣山在縣西五十里三十二都上有白衣殿茶山在縣西八十里三十三都

聚青山在縣西五十里三十二都儒堂山又名宰山在縣西四十里三十都

鳳山又名赤山在縣西四十里二十七都鷓鴣山在縣西北四十五里十五都中有龍湫志要

云常有鷓鴣鳴故名

獨山在縣西六十里三十四都

千佛山在縣西五十里二十九都山足有寺名廣嚴周圍佛刹峯巒疊嶂出其上故名

斷橋山在縣北七十里十一都自石橋沿澗行可十五里則一石梁中斷因以爲名即小石橋也下臨危

澗亂石密布有龍湫龍拖石邑人罕至妙山在縣東一百步延袤一里舊爲城隍廟宋曹勛

建祐聖觀境民崇香火不廢舊有公館改爲社學鐘樓在其上俱廢山周圍皆民貨以居登山一望則

一邑之景致盡在目中蓋邑之鎮山也金墩山在縣西北三里志要云乃赤城山南行支壘

盤曲以翼縣治蓋妙山東橫山夾輔邑東此山在西蒼山蔚盆于左赤城輝映于右邑後諸山高厚峻極

而邑前面諸山呈秀爭妍邑街巷橫列三數成乾卦之象也

蔓蘿山在縣東北三十里十都箕富山在縣東十五里西畧

華頂峯在縣東北六十里十一都天台第八重最高處舊傳高一萬八千丈周圍一百里少晴多晦夏猶

積雪中有洞石色光明登絕頂降魔塔東望滄海瀾漫無際號望海尖可觀日之出入下瞰衆山如龍虎

蟠踞旗鼓布列之狀草木薰郁殆非人世智識與白雲先生思修于此有葛元丹井王義之墨池李太白

書堂

玉霄峯在縣北三十五里即洞天宮重崖疊嶂松竹葱蒨且產香茅直南異隅兩石對峙如門扉號小桐

柏

玉荷峰在銀山頂號金箱玉印

五峯在國清寺側正北曰八桂東北曰靈禽東南曰

祥雲西南曰靈芝西北曰映霞前有雙澗合流南注

大溪九域志以齊州靈巖潤州棲霞荊州玉泉并國

清爲四絕

水塋西峰在縣北二十里僧普岸所棲

紫凝峯在縣西三十五里智顓誦經有紫雲繞護故

名

大雷峰在縣北大慈寺主山東有蜜蜂洞在焉

九折峰在縣東北三十里十都智顓宴坐立道場處

孫綽所謂既克隋于九折路威夷而修通是也

蓮花峯在縣西北三十五里十三都以狀如蓮花故

名

通元峯在縣北六十里十一都僧德韶嘗卓菴于此

香柏峯在縣北六十里十一都以山多柏木故名四

望陰崖垂磴萬仞

列秀峰在縣西北六十五里萬年寺西

蘆峯在縣西九十里三十七都淨慧寺前舊傳葛元

植蘆于此下有蘆洋蘆坑

浙峰在縣西九十里三十二都一作岳嶺又有危嶺

在縣東四十里胡嶺在縣西北四十五里

苗溪峯在縣西五十里三十一都又名翠巖四面懸

絕峯頂坦平桃竹秀麗

華琳峯在縣西北一十八里十二都

香琳峯在縣西北三十里十二都

玉泉峯在縣西北二十五里桐柏觀前

瑞雲峯亦在觀前

紫霄峯在福聖觀前

臥龍峯在縣西北二十五里桐柏山之側

香爐峯在縣東北五十里十一都以日出時有紫煙

故名

蒸餅峯在石梁北出根子昔僧曇猷欲渡石梁訪方

廣寺有石如屏梗之號蒸餅

白雲峰在縣東北二十五里十二都太平興國寺側

大隱峯未詳處所宋錢厚之建雙清堂于其下王鉉

爲記

璫峰在縣南十里二十都

玉女峯在縣南二都

白郎巖在縣西北三十里十四都齊僧普耀自遼東

憩此有神號江白郎告曰此吾所居以師有德業推

以相奉故建寺號曰白巖唐長慶四年今白餘豐首

禱雨焉時有異物似龍自穴而出至寶曆初再禱亦

然王展爲之記

百丈巖在縣西北二十五里崇道觀西北與瓊臺相

望峭險東臨四山牆立下有龍湫翠蔓蒙絡水流聲

淅然盤澗繞麓入爲靈溪由高視下淒神寒骨北望

石口呀然如張頤亦號獅子巖有石牀可盤踞

獅子巖在繫船山北口呀然如獅子故名下臨小溪

險峻不可陟惟可仰視有石棺石櫃石爐之屬舊傳

天台本東海島嶼理或有之東望有小亭即龍祠

翠屏巖在縣南二十五里二十一都八峯山上下有

龍湫志要云山形壁立如屏故名遠望山勢中平如

案兩端略起似展話軸又名展話屏

曹家巖在縣西三里二十都有靈康行祠今廢旁有

小湫舊名五龍潭

龜巖在縣南五里闡法寺側三巖相連其上如一元

至元中忽一夜雷雨有聲轟然日視之其巖左脅橫

裂闊十數丈深不可測

寶陀巖在縣北二十里十一都

捨身巖在縣北二十里石橋側

佛巖在縣南一十里二十都峭壁屹立如大屏其色

丹赭號小赤城

隱身巖在縣西北二十五里桐柏觀

隱巖在縣北三十一都神跡石之東

麻姑巖在縣南二十五里一名仙姑巖

靈巖在縣西五十里三十二都巖洞虛迴有石如案

與浙嶠山相連中有小嶼號曰文嶼左右魚石盤列

映帶

響巖在縣東七里人呼之輒應

大小石鎖巖在縣西北十五里福聖觀西盤折峭峻

舊傳其地積陰夜聞呻吟聲云是冥司拷掠之所按

唐裴甫作亂王師會戰于此豈死者之精魂未散而

然耶

鑿字巖在縣北三里十一都巖上有萬松徑三字各

廣八尺不知何時所鑿由巖至國清昔列兩行大松

今無

鷹嘴巖在縣西南三十五里二十三都

拾得巖在國清寺俗傳寒山拾嬰孩子此即名拾得

烏石巖在縣北五十里十二都赤城南又名烏岡

顧儒嶺在縣東一十五里十都舊名東岬有顧儒讓

書堂故址

八桂嶺在縣北五十里十一都孫綽賦所謂八桂森挺以凌霄

察嶺在縣北五十里與金地嶺接漢高蔡所隱有讀書堂故址

金地嶺在縣北十五里十一都金錢池側一名佛塋峰

銀地嶺在縣北二十里十一都即定光佛示智顯處

杜潭嶺在縣南二十五里與臨海分界

黃振嶺在縣東四十里與臨海分界

關嶺在縣西四十五里十五都與新昌分界上有朱

葉三侯王廟有司新任經此者必祀之

筋竹嶺在縣東四十六里五都與寧海分界又二十

七都亦有筋竹嶺

伏虎嶺在縣西一十五里

白水嶺在縣西二十里十三都

黃壇嶺在縣南二十五里二十一都

斜嶺在縣西四十里二十七都

石壁嶺在縣西四十五里二十七都

羅公嶺在縣北五十五里十一都

盤來嶺在縣西北五十里十五都

鎗旗嶺在縣西七十里三十五都

梅枝嶺在縣東八十里

摘星嶺在縣北一百里

山隍嶺在縣東三十里三都

興化嶺在縣東四十五里一都

黃山嶺在縣南十里八都其麓有鋪

嶠嶺在縣西九十里三十六都

王顧嶺在縣西九十里三十七都

金黃嶺在縣西四十里二十七都

烏巖嶺在縣西四十里二十八都

王會嶺在縣西北五十里二十七都

牛石嶺在縣西北七十里十五都

羅漢嶺在縣西北六十里萬年寺東南赤城舊志云嶺有巨杉偃蹇大百圍凡供養五百大士必于此

桐柏嶺在縣西一十五里十二都

洞天嶺在縣西北三十里十二都桐柏山上

魏嶺在縣東北三十里天封之外舊產茶

招隱嶺在縣東北五十里十一都昔顧歡招同郡人杜京產隱此

菴頭嶺在縣西南十二里二十三都

孟湖嶺在縣西六十里三十二都

蒲棚嶺在縣西南七十里三十二都

牛路嶺在縣西五十五里二十七都

玉京洞在赤城右舊蓋十洞天之第六茅司命真君所治或號太上玉清天或號玉真清平天或號上清

玉平天會稽記云赤城山有玉室瑤臺許邁嘗居之因與王羲之書云自天台山至臨海多有金堂玉室

仙人芝草赤城事實晉柏碩因馳獵深入見其中有名花異草香氣不凡又徐靈府小錄云其下別有洞

臺方二百里魏夫人所治南至縉雲北接四明東距

溟渤西通剡川中有日月星辰瑤花芝草自晉宋梁

隋暨唐天寶嘗以日中星鳥望秩茲山今洞口有石

刻玉京二大字旁無年月可考宋咸平天聖中屢投

金龍玉簡今潭塞側有道人洞其中三石穴險不可入

劉阮洞又名桃源洞在縣西北二十里十四都護國寺東北先是漢永平中有劉晨阮肇入山採藥失道見桃實食之覺身輕行數里至溪澗有二女方并笑迎以歸留半載謝去至家子孫已七世矣宋景祐中僧明照亦因採藥見石橋跨水有二女戲水上恍如故事焉乃疏鑿為亭植桃紛擁元祐二年邑令鄭至道始鑿山開道夾岸植桃數百木仍即景物之勝隨處命名攢峰疊嶂左右回擁中有澗流隨山曲折水窮道盡則有洞潛通山底深不可測其林木瑰異殆不類人間乃即山石為址結亭其上榜曰浮杯鄭因為記

丹霞小洞在縣西北一十五里福星觀東北舊傳葛元煉丹于此有仙人拍手巖唐刺史柳泌于此煉藥有故址在其下

蓋竹洞在石橋側宋憲使何偁嘗夢遊其地訪之不得嘉泰元年邑令丁大榮因禱雨得之洞深三丈餘中有二硤穹窿幽邃下視攢峰疊嶂如列翠屏

坐禪石在縣西北三十五里慈雲寺東舊傳有壽禪師宴坐于此
鷄籠石在縣東八里九都以其狀名
拋陀石在縣西一十五里十三都俗傳仙人自擔石擲此
磐陀石在縣東北五十里天封寺
擔石在縣東十三里六都其石長十丈倚巖如擔下有二巨石在水濱故名

神蹟石在縣北二里九都石上有大人跡鄉人立廟于上

鬼壘石在姚家山上高數十丈俗傳一夕仙人累積而成又名仙壘石

縣前大溪在縣南五十步源出東陽縣界以其受始豐青溪桐柏國清衆流暴漲勢甚洶湧瀾漫無涯大抵皆發源澗谷易盈易涸順流而下凡一百一十七里至郡力可勝四十斛舟水落則不可行矣其餘小溪俱不通舟楫志要云源出大盆山合寒明二巖鵲鵲諸山溪壑桃源瀑布及始豐湖衆流縈繞縣境演漾清洄環抱如帶出東橫山側逕邇而東至鳳凰山側又會寶華之源五百靈溪歡溪等水于大覺寺山麓折流而南至臨海界入三江以達于海自築城後名曰學前大溪

始豐溪在縣西百步源出大盤山東一百八十里與青溪合始入大溪

國清溪在縣北一十里發源自佛壠山南流至神蹟石會于大溪

神蹟石溪在縣東北三里俗名白鶴溪接國清之水至廟側分支一入臨川橋一入孝義橋俱會于大溪緒溪在臨川橋北俗名後堂溪自神蹟石流經臨川橋以達大溪每暴雨奔濤如怒勢不可禦以其溪皆赭色故名舊有從化橋今廢夏赤城築見霞亭臨其側

青溪在縣西五里源出天台山南流至桐柏又南流三里經三井下流爲瀑布南入大溪

檜溪在縣東二十五里孫綽所爲濟檜溪而直進是

也徐靈府記註云出華頂從鳳凰山東南流入溪又以齊顧歡嘗居其上名歡溪志要云流往十都至六都與桐柏靈溪諸水合而西經大覺寺前由大溪以入海

靈溪在縣西北十五里福聖觀前今縣東三十里亦有靈溪蓋其名適類云

乾溪在縣西十五里其源出石井山舊傳僧曇猷飛錫救老嫗溪水立涸故名

夏家溪在縣東南七里

左溪在縣西五十里其源自左溪巒與關嶺接委蛇曲折凡七十里至大溪

福溪在縣北四十里晉束皙啓蒙記云天台山去人不遠路經福溪水險而清蓋是時已有此名矣其流西入于剡

折溪在縣東北五里舊作浙溪發源自黃壇潭卽螺溪也

玉女溪一名女梭在桐柏觀前名女梭福地發源自洞天山過女梭洩爲瀑布下入靈溪會于學前大溪

界溪在縣東四十里與寧海分界源出龍鳴山流入寧海

銅溪在縣西北二十里源出桃源洞以其水色黃如銅汁故名一作桐溪

關嶺溪在縣西北四十里自本處發源會秀溪以入青溪

赤城溪在縣西北五里源出赤城山流入大溪

響山溪在縣東一十五里源出響巖流入大溪

幽溪在縣東北二十里源出大慈山流入螺溪

南鼎溪在縣西北七里源出大慈山過國清雙洞入于大溪

羅木溪在縣北六里羅公嶺南源出華頂流入剡水母溪在縣北一百里摘星嶺南源自華頂入寧海界

石橋惠澤潭舊名惠濟在石梁之下有龍甚靈每遇歲旱致禱就曇華亭行禮從高俯瞰有垂肅敬宋嘉泰元年邑令丁大榮建竹真亭于潭側以爲祈禱之所是年大旱致禱有異龜出現甘雨均洽遂上其事賜龍君祠額曰惠澤四年忽潭水湧出金銀藏錢圓徑六寸文曰太平通寶宋太宗賜以鎮潭者僧徒分攫則青龍驅逐樵牧採取則巨石塞穴乃白于縣命送還潭

蒼山靈澤潭在縣東四十里第五都三潭列其下深廣瑩澈有龍最靈嘉泰元年禱雨見異龍遂得雨縣上于朝賜龍君祠額曰靈澤景定年間旱禱輒應封靈澤孚濟侯

河引潭在縣西七十里三十六都其山高峻朝暮雲雨靈應甚多人敬事之

百丈潭在瓊臺雙闕間翠蔓蒙絡水聲淅然盤澗繞麓出爲靈溪有龍甚靈

石潭潭在縣東五十里四都靈澤轉東十里許小溪亂石中浮青蓄黛水深無底有龍甚著靈異

金橋潭在桃源洞水清可鑒毛髮早潦不損益宋令鄭至道以僧見金橋跨水而名

深坑潭赤城舊志縣境圖在縣東筋竹嶺側而山水門又云在縣南二十五里巨志在縣西二十五里二

十七都邑志爲是

瀑布潭在縣西南三十里二十三都無相院側一名戲龍

雷馬潭在雷馬山上石崖壁立登者以縋懸挽至山半又挽而下方到潭側其深莫窺

蟹渚潭在縣東南十里八都響巖上其中有龍禱輒響應今久湮塞

黃壇潭在縣東北二十五里十一都舊傳僧智顓放螺處今巨螺出沒于潭之石筍上每鳴吼則有大風雨

丹霞潭在縣西北二十里十二都丹霞洞下即柳泌煉丹處

鼻山潭在縣西十五里二十三都

黃婆潭在縣北二十五里十一都

翠屏潭在縣南三十里二十一都

海坑潭在赤城之陰

洗馬潭在縣西北七里今落馬橋是也

柘溪潭在縣西北三十里水極深泓其前橫石檻又有石室可容百人

洗米潭在九女碑之下每日于辰午酉三時水渾復清狀如洗米

巧尖潭在縣南十五里二十三都其龍最靈俗云巧尖雲起雨可立俟

垣突

泉湖在縣西五十里三十都茅君傳云霍林司命赤城玉洞之府

墨湖在縣西南八十步今湮塞僅存一小坑而已湖之西舊有金波亭

葉湖在縣西南六十里

玉湖在縣西十里廣百步長五里許溉田百餘頃俗呼馬湖

白湖在縣西四十五里二十都

鮑湖在縣東二十里六都舊傳有鮑鐵脚居其地年少時于湖側養鴨往往爲物所掣後旱湖涸獲一巨鱸其大如杵因煮食之身覺有力後沒于四明數顯神異土人祀之號鮑大王今湖側猶有鮑姓居之

妙山塘在妙山上產綠毛龜今無

降真塘在縣北二十里徐靈府記云桐柏觀前一里石壇前有塘名降真中植荷荷自塘一里出洞門西峰即王真君壇也今湮沒

鹽塘在縣東二十五里五都蒼山之側周圍可百步宋元以前其水鹹故名

醴泉井在台山西北衆妙臺下其水甘洌飲之可以愈疾

三井在昭慶院東唐時嘗遣使投金龍白壁舊傳爲尼所觸一井自塞其二深不可測每春夏時雨則衆流灌注激湧雷吼或云通海又云海眼宋咸平中嘗醴祭投金龍

義井在縣西南市

丹井在台山西北舊傳葛元煉丹之所

泉井在縣西四十里台山之麓發源甚遠深可五尺每秋成多有批穀自底而出經旱不竭曾有一婦浣穢衣其中水經月渾不可汲居人祭之復清如初

洗菜井俗亦呼爲三井即蘭法寺井也其水甚寒冽若以錫瓶盛之則透于外其下五十步許又有一井

石闌上刻云建炎二年置不知何時所穿亦經旱不竭

楓樹井上有楓木高二十餘丈大可數十圍其中空虛已久坐可容數人水味鹹相傳通海井邊有陂陀小嶺謂之楓樹嶺

墨湖井在台山西南墨湖側雖旱不涸

智者泉在大慈寺側今蕪沒

湧泉在縣西一十五里三十都台山之下

錫杖泉在國清寺昔寺僧取水甚遠普明禪師以錫杖叩之泉水湧出

巖泉在縣北六十里天台山中

龍鬚泉在縣西七十里寒巖洞口以其噴薄如龍鬚故名

石白泉在縣西北一十五里十二都台山下水經夏不竭清甘可愛

卓錫泉在智者嶺即智顓註涅槃經處

應心泉在萬年寺西宋參政賀允中寓居于此泉自湧出因名允中自爲記

曹源在國清寺後有窪池經旱不竭宋曹勛書曹源二字刻石上

右軍墨池在台山華頂峰王羲之遊西郡時有墨池在此

放生池在赤城山之西舊志隋大建十年智顗所置
凡三百餘步勅禁採捕國子博士徐克孝撰記宋紹
興甲子勅置放生池一所于赤城之西廣袤三十餘
丈遇聖誕節則官吏于此縱羽鱗爲集福之地